

楊忠烈公文集

楊忠烈公文集卷五

觀陽李贊元望石甫校定

閩中鄭觀吉賓侯甫

全叅訂

雲間陸鳴珂天藻甫

書

與李夢白司農

年來水陸漕輸風雪霜露拮据靡有寧居若在漢高
時自當首勞鄧侯耳試問如今部堂誰爲勤倍功倍
而宮保璘玉與優叙擢遷偏不在此每爲經濟名世

嘆惋焉曾有一字附敝縣一運官計或未及達也嗟
夫于今時勢似不可爲矣凡實實做得事與實實濟
得用實肯做事以濟得用者多出不得頭結不得果
此世途之乖舛亦人賢之劫運也然白臺之幾年勲
勩明在社稷顯在人前而遷叙獨在人後則世運實
爲之也雖然暫且冷一步讓一步尤大人之善藏其
用亦或造物者欲厚其濟于畱都重地也翁臺當不
以不肖言爲套爲漫也况乎父母俱存兄弟無故天
人不愧勲業在朝以黑頭八座少年犀玉以佐斑衣

恐我朝無此兩福人矣託在知契之末又不勝引
矣至于不肖才非濟世但放心欲尋五岳之游春初
已結伴泛洞庭君山而同行入病暫送寧家卽留買
舟下匡山而禮垣報至便不敢出門矣多事之際言
不出疑于畏避言出則所挾持以往者何在一或有
差則半生俱擲况異已之嫌妬未消乳倖之憤悃猶
在出豈易言之耶卽成敗利鈍非所敢計未必有補
于時徒供人筭計亦儘無味弟原欲上一乞休疏商
之李載星以爲不可且謂非小臣體梅長公書謂舜

公不出是無人理而掌院則屢有字屬人督促當以君父爲念彼實不知弟此時出不出之難也飲水在念出處交爭接得手教披讀如面中間開指詳慎不啻謀已也肝膽骨肉之誼直令人剖腹藏之大約時事都是精神散而不聚寇得倖以肆其內侵奸人又得倖以恣其外虐須得當事者確有淡心有所以聯屬衆正之精神而更妙于用君子旣得從容以畢其用而小人亦無所借以行其毒而反入我之收拾而不知乃此中收拾在外易而收拾在內難客觀二物

日近日親此豈易動外若激之反迫而爲奸人用矣
此須有去之之法要于一摘卽下不則寧寬之而量
上則更收之使附我而爲善乃爲大聖賢真作用不
然自爲一網打盡而禍且中于朝廷是亦我輩不能
無過也然此非言官能矣台臺以爲然否

與蒲圻長

側聞老父母之泊蒲也清似玉壺冰明如素霄月直如朱絲繩溫如嚴冬旭年來斗杓之所斟酌雨露之所滋扶風霆之所鼓舞山川另是一番氣色今春再過漢陽漢江左右誦述德政粒種不一蓋山林牧豎無心言之不肖無心聽之言者色飛聽者不覺神舞當欲飛舫直聞蒲圻次且未果而山陰之棹不必見載而此嚮往精神至今猶欲前也接得手教如奉溫巖中間崇獎非分翻愧兩朝非常眷顧報稱未終感

激之餘不覺汗下也不肖旣幹濟無長山林猶足藏拙前奉不必起用中旨淡幸婦寺愛我已放意尋方外之游不意忽有前命多事之際言不出疑于忌君言出則所爲籌時副位者安在若無濟于時而徒取容容又非我輩本色則此出亦甚難矣惟是有濟于時無曠于官斗衡在望庶幾推安節先生之愛終有以斟酌我乎真切真切至于政聲第一無論全楚直指固有人倫之鑑者卽不肖秉懿之好亦何敢後人佳蹟報成清華虛首席以待矣

又與鄒南皋

春初不肖漣政爲方外游歸家接手教例台臺汲引
至情也萬侍御歸再奉翰諭而沈掌科又倍道長者
注切深念漣則自慚前附掖垣祗糜大官日食後一
逃繒繳穩忘不世君恩此皆大君子之所必誅也顧
辱拳拳汲引惟恐不及如此台臺豈愛不識而之人
以官哉人臣孤忠可効卽萬死不辭況得大人君子
提携肯自菲薄業已斥斷家事以見女託之密親不
復再計卑躋赴召偶見徐侍御駁孫宗伯綱常疏中

獨揭移宮一段幾欲以漣代弑逆之死只是欲漣不出耳諸人之綱都布定漣出未必有益于時徒多角口一番不免又分諸正人照應分辯一番不若落其殼中引避不出冲聖之前省得一分激聒多事之日少開一分角爭安心認與王安相通作千古冤鬼儘自不妨非臣之敢于忘君不思從大君子後少効補浴也但不免負正人汲引深心是爲長夜耿耿不寐而人不肯容則亦沒奈何甚矣惟台臺幸憐而宥之漣于溪山見衆正連茹覺此時君子勢盛而小人道

消盛當防疎而一消則百謀伏要在君子端我之本
以服之厚我之氣以勝之消我之瑕以防之而又平
我之心以容之端在大人收正已正物之化矣福清
原是正人自能與台臺同心同德卽或有一事一人
而小人或巧爲間而善爲借漣謂台臺當以一片至
誠聯之千秋大業助之畢竟此處天下軸也長安日
遠未審近日光景率爾妄言台臺以爲何如至于不
肖請乞事倘得台臺遇間乞以該部知道了當爲鈔
遞非敢忘國也政省一碍眼之物以淨人心也嗟夫

景星慶雲現在君前而竟不得一親承是何俗子無
緣至此耿耿此心卽中夜徬徨矣言之哽咽奈何

與李湘洲宗伯

一別台臺卽是二年來也去歲紀綱過縣得接手
喜如對面而滿懷欲言終不得達屢晷一候而應門
無可遣者又病與冗會歉缺豈只沾沾寒暄哉年來
長安日變漸至憂在內廷此其禍不得不深恨于小
人之害正以害國也庚申秋冬之間皇上精神與外
臣相信相一中璫猶有可用者假令深心遠識得安
都門南昌漢陽可與爲善朝夕晤語之間令其大頭
腦處有清正幹濟之力聖主之意向一端群工之膝

理一清上下和協定不至如今大涸大亂也此非誕語也卽如前歲中秋之事實社稷安危之一關也無手教半夜一言不肖漣未必敢與左道長明目張膽要大老于玉門半日默遣去禍本于左九月初一宮未必能移而垂簾稱制之事成矣猶記台臺之言曰此實安危所係但此事在未然我爭之而成未必有名一爭之而不成定有烈禍然我儕臣子要于先有濟國家名與禍都不必計嗟夫世有此盡臣之心哉惟台臺一去二三老者未必無正氣好心而不學無

術識差一着膽怯一步于微漸處眼漫于吃緊處差
繇無相近相信人點破提醒事故一壞不可收拾小
人反得倒之以爲用故曰深心先識君子一去國門
而禍已兆矣爲人用之小人朝夷暮貶可勝道哉已
矣無復言矣年來老成力量周家宰猶有可觀而一
言去之如逐小兒百方搆害經略者計似已定小人
走乳保徑路已成經略當無安理獨恨東事兵刃未
集豈容輕試百方慎重此不易之論而彼人畢竟都
與相左何哉周熊俱逐何害卽楚人盡逐亦是無妨

恐汪劉之禍漸漸中于社稷耳。小人是何心腸。當時楚人輕信人相附而畢竟殺楚人者盡相附之人。線提也。特往時殺人不見刀。今乃自出手耳。已矣。無復言矣。川中事今未知如何。大都變初開時謀在未合。機在猶疑。而援遼兵可借與附近土司可合。有能如王文成夜趨吉安。項襄毅直薄賊巢。事未必不倉卒有成。乃使聞變之後獨一秦婦人鼓義相逼。已見漢無男子。而又不見隨有人鼓其後。都可嘆也。今黔蜀二撫未知如何。而張涵月在磁州捕逃卒十六人立。

斬以徇差有可觀未知此番動定何如卽邊騎二三
月來否我不惹之使出來也台臺視此想不能無潸
園女之憂也看來大勢須是天祚社稷必是司馬相
而後太平可冀耳日者條風布煖君子道與時亨花
間彩服大椿日煖是時三公不易一刻不肖遠在深
山無能樞趨展望亦生平缺事也時因羽便肅此申
候不盡之衷筆舌終說不十一也

與王軒錄兵叅

方今外患內憂層層變現須得深心大力遠識至誠君子始能撐立若論名世的惟老公祖一人蓋有擔當而不露其跡卽員融而惟求其妥事之重大處眼快膽健不求人知而早有先覺密有幹濟卽功在國家而處之恬如人之賢不肖納之千頃之中而人每心格意消默受我之鈞陶而鼓舞此有一段襟度精誠未可與不知道者道也今國家自治不暇綸綏恐寇未必不觀瑕生心去年延安雖全猶未可恃此行

戎膽落矣知軍中有范老子矣一人可無西顧而天下事可憂尤多但願早晚得正席衡樞庶幾天下治平可冀耳弟本駑材無堪遠駕卽今時事多憂安攘自有群公世間事已勘破過半有意問向平微游之事不知皞皞雲水可得果此志否春日載陽君子道與時亨有懷祝壽無計獻樽乃辱手教遠問感不知所以承矣肅此報謝依戀之私筆舌不盡

寄張學海

不肖廢棄以來屢蒙軒車不避險遠顧我印堂古人
千里命駕雪夜泛舟未足多稱不肖草蔬同飯款語
連床長者亦不我督過則客之爲郭有道耳原當登
堂謁謝并布積依而冗與懶會似花柳前川無緣領
眺何得領略玄旨兼得借觀武湖中生洲盛槩數舍
之地若隔弱水蓬萊楊生俗趣在胸填塞且亦報施
之謂何慚且汗淫淫下也不肖北上興猶闌珊不出
爲畏避出又恐積負乘真有左難右難者翁臺更何

以策之引領明德厚誼神戀戀如有結也豈但尋常
交游之情與哉令郎想董國不窺也從來天不負苦
心人更不負世德人好爲祝拳拳也

寄梅長公

原欲過桃花嶺一尋前五年之游也而懶人日日說
過混過已又想到麻城甚難懶人不慣到處周旋畢
竟夢寐之間未見吾兄一面成一缺陷二月爲洞庭
君山之游問鼎湖仙事再欲下問匡廬以舟中甚熱
而回憶吾兄當已北上矣至信陽乃聞前旌猶未發
也如何得飛到魯山共一日話大都時事堪嘆內外
多難無真心真力做實事得先着男子令內外都幹
濟得好看成模樣耳今當脂車北上矣正人引領明

主待助似不可再遲看此時外面大匡廊當事猶是些正氣人天下事似猶可爲只是要着着實實做得一兩件方不孤諸正連茹一番不然將謂諸君子在位亦是等閒雖是小人已弄壞天下又教正人費手却亦不免借彼中口實也年兄以爲何如弟前已快中官尼我可以藏拙躲懶不知何以復有禮科之起多事之時并多忌之日與無用之人出處都難言之擬欲仍告病而思延以爲不可乃李載星在前又不好先出又是內計在邇似不便直入承當年兄更何

以教我蕭元恒前謂弟直當從赤松子游無再戀長
安功名此却是善藏善退法門年兄當爲我決之至
于廣寧事畢竟熊老師少一挺身入廣寧先以上方
斬逃撫與民守之死弗避也落人多口可恨

與李侍御緝敬

稔惟台臺覺在民先心能我盡真能以天下爲任非
但以富貴功名了此一生者當時一奉顏色卽傾倒
未淡而目及道存勁骨遠神罡風沉識至今猶在精
神寤對問也每念于今世道綱紀頽倒殆盡正氣摧
折無餘固由險仄之人過用其偏亦由意氣之激交
成其釁釁開而鬪起或又用兩停而中調之調之未
必平而究猶爲險者用此世界之所以蕩平無時而
正入常不得盡出爲縣官用則主衡轉鈞者未能妙

提其關揆而徐歸于準平耳入夏以來不肖等二三
同心人費盡如許精神得一有骨力者統鈞庶幾正
人之幸乎而大關頭未清卽轉爲巧手潛撥當時急
局正已物正大人入贊銓衡庶遂麻扶直而竟泥于
俸之淺淺直是天之未卽欲平治天下耳觀今事勢
夫寧當事者受人之陰用而且受我爲用者顯攻矣
可嘆也可嘆也

與孫侍御

稔惟台翁倫品治平名世當年辨奸一疏直接歐文
忠與諸條列無非一忠讜遠謀也卽今攬轡淮揚寧
惟裕國此莽宕江淮水原非無事之地又兼以東稷
西氛民急財空諸奸倖小人蓄亂何可勝原亮焉而
瀾靜席安此豈盡潢池萑苻中無有妄心夫鈔于收
攝密于彈壓厚于固結有默操其要領者矣財賦仰
藉之數豐芑關係之地廟廊無南顧之憂社稷之功
于是爲大矣不肖弟亦爲縣官引手加額乃江南旣

已輯寧而內面主德聖躬猶有伏慮外面陰陽消長
猶在貞勝所藉大君子早入而聯屬衆正提挈綱維
護持元氣醞養太和更爲泰山之仰重焉則又不肖
弟日盥手焚香不啻農之望歲矣翁臺當不以弟言
爲謾也至于不肖弟辱翁臺之契也自周冲白掌科
所一奉顏色嗣後崇効寺中再辱遠駕款語移時彼
時已一言千秋一揖千古矣卽形骸若遠有通之者
矣

失題

稔惟老年丈沉神淵識岳力丹心確是當今治平名
世也卽今豐芭根本之地并鄴陵易動之鄉鼎藉澄
清我知北斗之所斟酌風霆之所鼓盪雨露之所滋
濡慮無不民家戴春吏人履霜好宛喘月雨雪見睨
者社稷實式靈之矣弟追隨長安實有誠服庶幾長
得提携以共事幹濟無奈弟人微府疑致生指射關
口無當裝聾非我記當時過爲年丈所憐首疏畱我
有曰憂天之大業已成夾日之鴻功若免豈不誠高

云云仰見老年丈愛國愛人淡心矣弟則無以當也
嗣是諸君子連翩論列不肖弟之罪過得明至于今
日猶時入君子之口使拙守無緣如弟之人以淺俸
而躡清卿權輿托基自有專屬知我成我中心藏之
卽沒齒難刊矣第弟謫劣終無足短長耳今雖衛鶴
乘軒何以不預知已而有益國家則望老年丈始終
有以提携我也真切真切

與李淮撫

河南差回辱手教幾爲天下事收淚讀之也長安中
近日正氣人頗集而提以一段淡心握機挈領其間
要于世道有濟明主知近正人之有益而小人無所
容其口古稱一人定國專望台臺之入矣今日剝膚
之患最急東事而心腹之憂則客魏二物東事俾得
一好經略好大將便足了此而客魏爲上不得于李
侍時母子相依者今復彙倭日親處此甚難須尋妙
于去之與立地去之法乃可不則善收之爲用令倭

好事計不及此而只于言語上做工夫體面上完套數或反跳而爲奸用激而爲國仇則憂方大矣而二三正人又須精神孚合肝膽商量而聯屬同心共扶日轂安得天下卽不可爲無或隙而爲小人所間又今日名世第一義矣故願台臺之早出也至于某原絕夢長安亦以人無當于世用耳不知何以又有今命多事之際言不出疑于畏避言出則伎倆止此未必有補于時而或止積愆瑕不如甘畏避之不失善息也兩念交戰台翁其有以決我也熊芝老以輕浪

少年斷送拖累雖馬文升或當再使遼東爲眼前苦
矣猶記台臺之言曰男子死在疆場完事如今卽能
回誰肯饒你死老畢竟于此處拿捉不定可嘆可
嘆川事聞奢寅父子尚聚兵欲取叙州而安酋聽撫
猶未定真僞事須得韓襄毅項襄毅辦之爲妙只靠
樊賊自餓而死不免費時費事此時固不當令首再
延蔓也台旨以爲何如

寄左浮丘

恭喜臺遷涉海到岸計年兄在衙門中護持正氣臨
屬同心杜防宗社危機禍本多少良工心苦寧國受
其益而我不必有其名庚申中秋後深夜三嘆猶記
年兄之言曰我輩爲國家期于事濟豈怕一死只怕
死而無濟于事旣而女戎稍遠卧榻謀后之奸不成
牝晨不至家索此一點血心九廟神靈獨有式憑耳
古稱一人定國丹心夾日年兄當有之第歛却神功
寂若無則又韓魏公之不處功名耳小人兢兢不忘

亦復以此我輩成敗都可付之天下後世而已接得
來論謂宜避息山中亦自善藏而此時邪氛猶惡于
中微有撥轉善爲提掇還須年兄着念所謂無棄以
爲休也年兄當不謂弟爲漫弟以人微府疑爲群小
惡口相加雖幸公道猶明而吹聲終是未免或亦當
開頭大發一番自是骨肉至愛但弟遠去長安疏入
未知得到御前與否奸人不免相駁一時答應未便
弟妄意小人籍口直是誣以通王安假傳聖諭爲居
功地耳畢竟移官原是公論聖諭終是皇上召至乾

清手付閣臣與十三人共見上說與他有仇而垂簾
之說則庚申九月初四滿朝駭傳欲上公本以爭未
果者而正路幾番疏列似已明白當日會議于移官
事曰非諸臣力持大義云云而巧言惡罵若言促移
官者又已外察處矣有謂弟儘不必置辯者郭金谿
惡語亦不過牽帶數言旋向人自悔不如始終成就
一个不爭未嘗不是弟故安心不言一字只箇五月
內一疏乞休而已年兄以爲何如

寄李本寧宗伯

漣常念王元美先生言漢廷兩司馬吾代一攀龍千秋快語然吾代兩濟南太倉又集成一大秘矣館閣無能留先生此猶責在世道乃今兩朝實錄竟不得一借筆削此典耶不光耶當事局于格套不特疏力請不但俗情太重亦實見地大處實低耳吾師言禮猶恨文獻不徵豈其文獻自在而故不爲徵自有軼世史才而故令後世嘆一時乏人何耶漣此語非爲先生說也先生當不謂漣之爲漫矣或者當事自

有意漸爲推引如董思白公祖難謂非一時騷雅由
藩司而奉常奉常而宗伯則所以處先生當有在先
生不總裁先生之名在總裁得先生實錄在他日乃
有光耳至于漣之出處非名宿謫遷也坐而蹠清卿
于造物爲不祥且多事之時爲人側目屈指之數或
一言之差誤及于事一事之蹠誤及于國何以自贖
無論量腹而飲卽知難而退亦猶得不能者止之義
也凡此念久已控之先生矣無奈二三同人從史當
事卽請告必不許獨善且苦責以大義而不知此出

在人爲易在漣爲難也先生身爲漣計當作何行止
前讀先生孝子捧檄之意亦不免心動而爲父母則
思邀恩君父乃君父以漣故受人誣捏掩其人子至
情人君大義而終忍心不自豈有此無氣骨男子昨
以語之賀兌陽年兄迂道學又謂劉朝逐范少卿有
狂肆妄言之旨是非未嘗不明且當逐朝怒范後而
津津言之彼夫又或謂我氣揚而逢君也語亦近理
然終是于此心婉曲不暢漣復典故不熟識見未廣
不知前代有如此等事賢者何以處之或有前代事

有可以互相發明者否欲一面悉領教乃竟爲病所
奪真造物若妬之矣願先生終有以決我開我也

答傅東漢

恭惟老親丈德足鑄人福能造物卽如弟無似邀倖
清除總拜雲蔭之旁敷也第弟實在多年科臣于雪
國毫無補拾况復病廢兩年于內憂外患繁事都從
躲過則挂月之臘榮實乘軒之象服祇是在梁鸛唼
豈真出谷鶯遷方深愧作過辱寵嘉領此注存已深
銘篆肅勒代謝至多儀則不敢承也二小兒喜得一
女孫枝開吉亦實分澤蘭畦老母賤荆祝申頂謝老
夫人幸附葭莩之戚惟在引領翟車晷一聚慶惟無

卷之三
棄之蓬衡籍寵喜席此亦聞聞倚玉惓惓真意老親
丈共肯圓成此徹切情乎又望

與福建提學

涸涸家居卽聞文旌指閩之信亦未及遣一介江干
爲閩中材梗楠文夜月者慶宗工遇而周客至也且
作人之盛今五十年猶用不盡前哲芳踪再見今日
弟更知此行國家尤受無窮得士之効焉何者弟以
仁兄之心品骨幹自是間代經緯固自與尋常局套
萬有不同但拭目爲券以待耳不意溽暑煩冗中遠
有手教從雲間下披讀喜如對面轉愧弟之懶而野
矣閩之人文原甲天下以法服收之自是快事未必

不是難事特以公慎之心濟之以敏而叅酌情理則
又聖人中道前此衡文此地如僉院之鄭元岳少司
馬之熊思誠皆善作宗師其事有可備裁酌不妨采
而用之大都作如此等地方如此等官須要成一品
格今賢者共歸而後來可法此亦終身根抵所在想
仁兄自有斟酌也至于弟人微府疑只宜束之高閣
無奈諸君子推引屢有督促責備但安分知止終是
弟初心今遠志小草念尚兩浮未定也時情難調時
事難爲恐出而無益于事或反悞及國家辱及知己

養由善息亦是良法仁兄知我何以教我

寄方孩未

一別長安卽音耗一曠也乃國是梟爭之際力有主
張于今衆正盈朝誰爲開闢所謂一柱砥定翁兄真
爲不愧而一年拮据疆場盡其在我臣力竭矣郭令
公陝州之潰韓魏公好水之失亦事統不歸而機非
在我耳弟日爲社稷慶而亦爲仁兄苦若弟之躲懶
淡山曾不能于多事之際効一言之用真先帝之戮
民而衆正之罪人矣昨夜實夢到壽州奉候悲喜交
集醒時甚詫其奇如何得一卽真無何而手教到矣

未開讀時喜不可言豈精神之感通兩人固形骸亦
渾者耶及開讀言言慷慨肝膽爲國忠愛弟實感而
涕下愧而汗下矣大抵長安事群奸巧美機關但可
低翻世界成紹聖之禍便可置冲聖于不顧今幸留
得皇帝在而喫緊處二三大老猶得力但言路上舊
識同心已多星散續到新來不同如面雖外之大奸
覺稍攻動而猶耐彈不知正人雖多恐其氣懶而疎
皇上旣不能主張首輔又復調停且摸捉不定此一
入鬼關頭弟甚危之世道剝復在此弟亦未必無心

止是力量識見止此恐無濟于用年來絕夢長安舊
聞新得俱都荒落聞命之日不勝飲水恐無以籌時
艱定群夢副衆正之推引更于知已有遺羞耳此心
血非門面話也尚希端人請教不知路可取道八公
山否卽擔簦千里亦所快心況手教見招能無色動
恨不卽生兩翼飛到堂前也至于弟蘊蓄原薄每事
筆下發揮不透若端居有暇今日第一緊關當言事
願一一示我古人所謂但有益于國家名不必自己
收也真切真切

與守道周公祖

漣北上有如許意緒欲一面請教竟不得也大都不能不出但不知可緩至中元後否弟此一入隨事効忠成敗利鈍非所敢計名不欲沽禍不欲畏只怕識淺一時差錯開罪國家耻及同籍中夜有幾感慨焉而最苦者恐要我管察年來察事定多一番翻案未必關後之人尋事亦自主事人稍徂成心耳弟意只以朝廷爲主以能否還其職掌以賢不肖適其人品亦並不兩邊照看惟秤之以平而行之以恕總之以

不恐錮人盛世爲心庶幾其可乎若得李載星改骨
弟亦願以此相成老公祖其以爲何如眼前遯事若
急而其實君身君德爲緊客魏二物親密不解此大
可憂此事弟當一言弟意此二物既是潛邸相依今
復柔媚日親疏入恐上未得省覽卽覽未必能行徒
以言爭無益此中須得一玅有以去之方不然彼與
外奸相固小人益得借之行私而天下事乃壞不可
收拾矣同諧同心兄弟有幾而深心遠識饒有幹濟
又有幾願年兄之有以教我而不至于迷也真切

真切

與游侍御肩生

年來東西不支皆邪黨摧殘有用之人凡出頭做實事者便不得其位一切在位之人惟養交投降做工夫職掌委如故事故百事隳頽眼見國家如坐漏舟大有不可撐持之勢矣二三年來陽明之氣稍藉仁兄共二三君子合力同心聯屬正人護持元氣約略來復然重陰剝蝕之後一線陽生其何能補從來正不勝邪久矣毛禹門之削籍舊司寇之斥逐舊宗伯之掛冠世界幾于倒翻矣而吾黨迂濶旣娛堂不爲

淡防且復借以題目夫環而攻之二三領袖正氣之人恐不能安其位一不得安而此番邪正顛倒當不忍言此氣運也奈何大都彼中善借人又善收人今日機構想又出此而吾黨直拙到底不求所以服其心使之無所容其間又不求所以聯其交使之無所庸其挑苟非邀社稷之靈君子道長善類能不空哉夫禍在善類尤可言也少主孤立于上群奸內外煽惑于下想到勢所究竟直欲共二三有心人痛哭一場也福唐氣脉猶正昨爲總憲開發一疏甚是有見

但得明主專聽左右不能播或中間吾黨一有心人
善出疏駁諸君子無復惡語相加使二三老成平平
正正維推察事世界或猶見有開明之象然而不可
得也某七月將已北上爲徐道長惡語暗刺移官事
不欲與之計較故一疏乞休以謝之免其耿耿不虞
疏未入而已聞升弟意言官未及卽出京堂無卽出
之理雖二三君子有字相促然弟入未必有益于計
事而弟猶計事中人何所自信而公然北上乎此弟
所以欲稍遲也眼前病根所在還是客魏二物彼中

全于此用精神此處不清世界終要倒翻未見有說
到痛癢處大疏若于此處打開點破卽未必能行而
亦令奸邪落膽我輩要于利社稷而已官何足惜弟
雖未見大疏一聞此言直舉手向天願天祐國家使
正人言得行也長安中賜環諸公氣象一新再無使
數君復爲彼用爲彼收方是經綸妙手受福不獨吾
黨也念之念之

再寄左浮丘

不肖漣去歲奉教後實已絕出山之念矣知有不相
容者在耳不知何故又躡陪僉院若徑出又似與正
推矣益決念請告昨偶見邸報范舍初請封選侍疏
中誣捏先帝如許話且描寫溺于選侍光景三番召
對皆以是故至于臨死猶極惓惓若選侍有必不可
忘之恩而皇上爲違命不孝之子總不必論此其意
無非重促移官者之罪成已碌碌隨人之是夫使人
之羅織兩朝不君不予之名至于痛念氣毆聖母之

至情而絕不見諒傷心廷辱君父之大義而反坐以
線提傀儡避實受兩朝特知而略無一言辯明譬之
雲心聽人辱罵父母而博不疑長者之名恐爲天下
萬世之罪人矣漣故欲秋初赴京一言卽請掛冠也

與蘇抑臺

應山距德里未必隔弱水而畢竟一對爲難徒令人
時動天際真人之想弟年來家居懶慢于知己省候
並疎甚矣稽康之懶病深也接得手教披讀如對中
間相念相勗至情逾于骨肉弟之感而愧可知也時
事多艱急須聖賢豪傑鼎鎮柱持覺世未易數數也
弟以人微府疑之物衆矢交攢不沉之海底不止以
託在同心共二三君子費盡護持必欲塵啓事以發
衝泌之光彼其一面惡語顯沮而此且一面破例閤

遷在大君子豈直私于此不肖人亦曰庶幾一片肝
腸或猶可佐吾輩爲國家一臂使耳而不知弟非其
人也究竟終身何以副此推引至去秋猶戀戀維桑
以善息爲念不過欲借人言爲引避計耳昨承左兄
手教重來謂伊欲寧家須弟到乃決歸計前不卽出
今可出亦非可不出之時力責不出炎洲傳諸君子
督促甚力弟更曷一請正乃手教固且屬弟出也當
非他人漫語弟恐出無益于時或反以辱同心知己
則台翁當更有以振我弟去年已收拾爲雲水之游

後以機猶有待遂纏滯至今大抵世上滋味只是如此不能做事業而但華靡到頭有何趣處不如就裏安頓安頓是實受用然俗骨入仙亦難言之翁臺久稱此中有得他日滕行下風願收爲雲鶴童兒也懸切懸切鄭公祖識量氣骨弟稱爲韓穉圭後身此有所試不獨吾楚司理無雙是翁臺夾袋中好風亦蘭譜中好友有可推引願言留神

答甘肅李巡撫

稔惟白臺包孺肅笑比黃河之清貞范文正憂以天下之骨力不肖恭斗仰海宗久矣天祚官家幸洛社不能久滯曳履彤墀朝端大開氣色卽今禹藉節鉞巖疆我知諸寇聞之寒心懼膽矣韓范諸公之烈再見今日我輩額手爲慶惟是正已物正大人在外則巖疆重而在內尤廟廊重夫襟領衆正以鈞統四方我輩引領更倍切焉則西夏功成入平章韓范兩公之故事自在白臺豈其有讓拜鼎翰之及肅此代候

并布積依統惟照在至于不肖倖逃彼其刀斧之餘
也向來鍛鍊罪過仗諸君子過爲推引叨附清班但
不知何以無負同好以有益國家台臺愛國愛人且
并託在同味當有以振而教我真切真切

寄友

在家常得相聚甚是快暢中秋匆匆相別過勞遠送
感念在心一入都中便勞苦無一刻之閒却又無一
些事做看長安光景都是如此混帳可嘆不肖原意
出山畱得九月先人可改一封不知受過封二次者
須題一本又思纔方到京上本求封似于義未安快
快而止未遂出山初心徒奔走拜客赴席弄得睡也
無一好覺飯也無一頓好吃却悔上京好淡矣想望
明年得奉一差回仍共聚首促膝何快如之又恐長

安人不肯等弟偷閒耳人歸草草代候京邸嚴寒獨
身孤寂台從于雪夜風朝擁爐呼酒親知吟嘯不念
楊生此時非僕僕冷面送迎卽慄慄呵筆作書與忙
忙問夜如何其乎不盡瞻戀統惟台照在

與岳撫院書

王三之獲實銷海內隱憂益此曹終不能成大事而蜂蟻屯構亦必殘傷多命撲滅費手山東故事可見矣然則今日計擒智獲與協同戮力者安得無功廟堂之上公論自在也台臺以未得元克起人之口旣已得元克矣寧復有去理明旨慰留甚至願言爲重地料理以完前功餘惟眷切未一

與熊操江

豐芑重地鼎藉紀綱眼明力定識遠機沉中間葆德
正人肅清邪祟綏靜地方留都宮殿山川另是一番
清明氣色固已社稷實式靈之若朱庶人之變聲色
不動殲其渠魁解其羽黨消弭在宗社烈禍保全又
在君國元神如此元功當王文成已事猶在焦頭爛
額之第二義也從來大聖精忠殫心竭力要于國家
陰受其福而我且不必有其名又何論功然我輩論
人論事須體勘至此方于一應縣官事有沉實幹濟

惜乎今之君子每事當機微關險處都不着眼着心
着手而如于處朱庶人一節亦從閒閒說過泛泛看
近反于事本容易消弭平時無戢寧密力有事無收
拾捷法當事無肅清權術或倖倖無事或屠戮無辜
而絕不相干之人不相干之事都作功勞論叙大家
弊玉贈麝彼此互相恬安搦筆至此不免爲之扼腕
長嘆台臺其以爲然耶弟本碌碌謏謏幸附在聲氣
之末而班行祗糜公廩世道毫無建明辱諸君子推
引濫冒清班已深皇恐今復濫竽紀綱重地恐稱副

未能于一身聲名何足芥惜將無辱同心同氣顏色
乎有以匡持提挈願大君子愛世愛人無卽棄我也
接得手教如奉顏色但恨無能面有請對耳天下大
事今昔清議南北正人主持襟領當有屬願言珍
重此世道倚毗之身也弟引領卿雲不勝拳切戀注

荅浮梁縣張父母

稔惟老父母臺下品稱湛露金莖器是撐霄玉柱居
然公輔遠量天下有待泊平卽今借禹琴堂亦是小
見行道之端爲銓諫借轍先耳不肖欽仰已久寧惟
河澗實切斗依但未獲一御李并題梅也我輩作縣
最苦最勞而行吾所蘊朝猷念父恩膏亦惟得百里
之地而君之足以宣也德意且歷剔煩難經披搔撼
不惟鍊識并足鍊膽透此一關天下當無難事想臺
下已自得之不謂不肖言爲謾也鼎望已隆清華自

虛首席以待但需次內召耳得接手教如奉顏色再
拜芳間縶不敢承又不敢不予孔邇大賢一領授餐
之雅矣數行代候一布依依統惟照在何旣瞻馳

答按臺周來玉

往者劉瑾汪直世界已在眼前荷老公祖岳力罡風
與一段愛君愛國至誠貫入于才情氣魄着不得之
地故一敵神奪而大慈就戮此其所掄于國家者遠
而且大沾沾功在人才正類又其小者也世界正賴
維持向以讀禮見奪寶吾楚之無緣得偏私大人造
福也惟是人生有不可逃之數人子有必不免之慟
妾以子而爲國之禎世之瑞何必不千秋長在定省
有終而顯揚無窮又在老公祖之善自得吾情矣棘

人藥藥尚失遣候拜手教之及惋惻如失肅此代布
依依尚齒顛候伏惟勉強飽粥節勞抑痛爲世道倚
重之身倍加珍重庶見素冠我心苑結總惟照在未

與鄭文水

當初小人之亂天下只是路道不令寬平好生黨類
猜度一味好以偏處人以氣勢勝人故及于敗若大
人拯世但以驅逐一二大寇頑使路道開明便聯屬
同心共做好事存一憐才好善耻獨爲君子之意嘉
與維新便共趨之路開而窮搜之心息矣大都世不
乏小人卽天不絕豺狼但使殺其勢孤其緣解其交
我但據不爭而勝之事理不聯而密之精神使小人
亦服于我之無可乘令其悔而從我則天下事定矣

而惜乎今之猶未然也防人之意多自勝之策薄各
相競官之意多而勉相併力之念泛甚之當軸者一
意巧于避怨密于迎人發言盈庭無敢執其咎自家
不肯時時謀君事但曰事做不得至少不可爲提掇
內外精神者精神如此之泛而不屬之天下求天下
之精神翕然不動以歸于平章從古以來當無此治
法年丈以爲然耶弟無當驟居內憂外患都不能効
得些力徒負官而集忌若聯合同心無自猜異無過
狹隘此心當有之而衆人尚未迂從也今天下吏治

之弊已極巡方者但了簿書贓罰完事而已于所謂
望風解綬奸盜屏跡者幾于絕望奈何

答東阿縣祝

稔惟臺下儀自漸鴻望隆鳴鳳拈花會上探得涅槃
妙心久矣幾年鶴琴鳬舄直作游戲三昧耳尸祝已
遍萬家頌流已堪千古乃治平名世之業天下所望
于左右者更重而且遠東阿則廢轍之地耳大都擔
當天下事只在識膽當年韓稚圭不輕以膽許人乃
稚圭之爲公輔器則王公從其司庫務識之蓋識膽
固性分秉成要以撼之不動熒之不搖畢竟要在煩
苦瑣屑中打透一番始當事握有巴鼻故作縣是我

輩終身受用只是我輩多于此中忽漫放過耳台從
此中深有勘誼火裏尋出蓮花大地無往不歸清涼
世界恃愛妄言忘其聲而好言審金石之音矣化國
之日舒長恨身未能游泳接得手教不減坐和風湛
月中也如何快哉弟崇獎過當則無以承當也肅此
代候并謝總惟照在至于循異聲華已指不二三屈
無論三戶楚矣我輩且分榮色焉事業遠大惟台從
益好爲之促對何時多是輯玉之日也有懷拳切未

答羅汝元雲南巡撫

滇南天末況今內剝外驚臺下彈壓綏靜與掌運帷
籌令助逆元兇授首而風林生齒獲奠安瀾此其澄
清之烈社稷實式靈之矣讀諸奏揭劉當詳瞻卽語
陸宣公奏議當亦無讓服服肅此布復冕楮戀切未

回馬總戎

久仰大將軍威名霍衛後身也楚黔借鼎秉鉞我輩
方幸酋醜報平有口不意輕率者易敵而不設備驕
吝而不聽忠謀遠略也夫將軍受師而出全師而歸
亦須論其人之所以敗與姑耐以略後功又不在于憤
憤一戰從債事者俱盡也則庶幾大將軍今日之謂
乎郭汾陽未嘗不有十路之敗韓魏公未嘗不有好
水川之敗今日已于當事者議大方之敗各戴罪立
功亦自得當夫無忘會稽之辱厲士鼓兵遠裔好笑

務佐新撫早收孟明曹劌之功名是在大將軍之好
苗之矣接得翰教并禦賊條議讀之見苗賊老成之
見而不能不扼腕于剛愎之自戕令英雄反落人議
論中也引領劍履紫雲茀護企望平蠻捷音飛入黃
金臺也芟楷何勝馳切延注

答四川按院

稔惟臺下善與人同道從夏大不肖得附同臺自幸
遂從麻直方歎無能報副邀庇再躡一階總之維鶴
乘軒終慚踞諸君子上矣苟共負乘遭譏自是衙門
之玷也庶幾有以教我俾無自越可乎遠承手札期
許非倫有勒爲中心之藏耳至于松山銀反諸酋大
都無擾之可耳中間綏輯其凋殘而救寧其觀望藉
臺下澄清之烈爲多我輩無憂西戎一路矣數行布
謝統惟照在

答項工部

久仰臺下清貞骨力卓逸風猷天下有待治平自是
于今名世不肖未獲交也而賢者頌述固不減時對
左右矣卽今借鼎要津通商裕國幹濟時艱所謂初
試清通之量于濟川之用耳接得手教如奉顏色姓
名得附掌記記存不失名下一士矣感而喜可知惟
是獎藉過分終不禁汗淫淫下耳引領卿雲斐疊位
星上下何當披覩兕楮瞻馳

答劉侍御

臺下道備四時之氣風高百世之師立朝特具千仞
鳳裁省方懋隆百世駿伐如此真御史恐今昔未易
數數淮陽旣江左名區更豐邑重地民澆日盛奸宄
亦復風起近日且聞有山鳴之異中外殊有杞憂今
幸有大人運斗其上心有必盡力有必竭以綏輯彈
壓之定知氛淨澗安我輩可高枕歌太平也翁臺幸
好爲之

答順天鄧巡撫

方今東事最急以爲逼近門戶之患也不肖則謬謂
爲門戶計誠當急備禦于樊籬而或者門戶但壁立
空虛則樊籬無所憑以爲後勁而氣勢中餒堂奧亦
因以無所恃而易爲外驚故關門之內都門之外必
當簡名宿蓄膽兵于此作隱然虎豹之勢壯關門之
聲援厚神京之備禦故東事最重莫如遵化遵化之
重端不在關門薊門下矣台臺于今韓范一人特簡
建牙中間討訓軍實固劑民心不于聲色張皇默爲

桑土拮据抑抑之四章若爲今日謠九廟當式憑之
矣畿輔農郊有甲兵十萬長城千里者在焉關門有
事無事長安俱可高枕我輩但有額手以慶矣

答新陞大理同知王育德

稔惟老鄉丈鼎衡之器自足匡持斯世天末一州斗
大豈足展驥而此斗大城也內苦民窮外膺酋患一
朝有事無備無恃竟憑遠心碩謀有以奠之安全此
中保全多少民命功德且與滇山滇水共高深矣二
郡一擢豈足言優庶幾卽晉蔣泉稍足大其設施耳
久仰鼎望莫遂通名接得手教仞萬里注存也并得
悉當日苦勞功高尤是快事引領卿雲斐頰披靚如
在天上曷勝戀切曷勝馳注

答程啓寰道尊

當今海內負王佐才而處積薪地者無如老公祖台下也別歷中外勞苦功高亦旣公輔譽隆節鉞望重矣秉憲楚南群此江漢萌黎于徵併抽扣無餘無里之時猶然席之帖而澗之安我儕小人家相祝望曰縣官予公生我亦庶幾不終忘我更卽予公鎮撫我乎只恐中外仰藉者重三戶不能久有袞衣耳真切引領卿雲高映薇堂鈴閣如龍如螭何當披覩兕觥延注瞻戀未一

答侯御史

黔中畢竟人謀失也倘令當日臺下遠在貴陽斟酌
前茅後勁奇正互出首尾相生更本之以慎念上無
些子喜功倖勝沾戀當元兇已就擒矣惜也天之未
欲平治留此病塊又耗損一身精血供伊消索耳奈
何撫制同事地方卽日已奉旨回籍而一日担子未
卸卽一日功過與同臺下之言自是責備賢者正論
伊當無辭新撫自能辦賊奉行尊議而更慎持之此
萬舉萬當着也臺下秋夏間卽當推京卿體中小極

本義卷之四
三
似不妨珂里調理還望早來聯屬正人護持正氣令
一人收大人正已物正之化焉又我輩所爲日以望
矣

答陝西巡按李緝敬

從來世界只在念頭初處轉耳天地變化草木蕃衍
原不從習得來有如臺下巡方念念在民在事而此
一點念頭初處亦自然能入于人之初故吏已治民
已安事已辦有在刑賞幹理之先者矣名世治平端
當有在安得借臺下此一點心付轉軸運樞者以提
撥天下人精神哉臺下福此一方中和位育自是隨
身所入乃長安人固望以清卿早入春明也傾倒之
懷瞻言何日戀切戀切

答南兵部岳

環海碩人風景名下會者瞻對奉教仰止逾洽方與
台臺正笏朝端主持國是令不肖繼得承下風乃主
上卒以留都之重倚毗耆舊嚴瞻之契直在鍾陵佳
氣之表也向來權璫專政禍亂人國台臺曾相與爲
憂頃者威福恣肆幾無至尊不肖痛念君側聲罪請
劍而蒙蔽聖明無益於事猶謂一介孤誠不能感格
乃舉朝爭之亦不得焉奸逆內外各有憑藉我輩中
且有畫策者廷杖彈臣抄捉臺諫流毒無忌跋扈已

成台臺閩心冲主共何以爲今日策耶不肖白簡無
功青山有在回天之力則俟之鴻鉅矣遠辱注存殷
情滿楮肅函報謝附布近狀臨穎依然

答休寧侯大尹

稔惟台下公輔遠量經濟名流卽今兩地絃歌一延
琴鶴治平名世之業小見其端而鈞統紀綱之地中
外係心襟領深矣日前銓司一推何足爲左右重亦
少見卓絕聲名固藉甚公卿間耳大都今日可以抒
吾蘊以酬吾君者在銓得以人材報國至于補袞拾
遺宣滯導困可以明目言天下事又無如掖垣只恨
行取之期有定尚急不得陸敬輿韓稚圭之用也接
得手教如奉顏色再辱寵頒何以當此授餐之雅有

中心藏之耳肅此代候并布依依惟台照在引領鶴
琴卿雲淡護何當披覩憑楮馳切

答山西巡鹽李

讀大疏及傳習錄仰見正人心正學術嘉與寓內士
大夫雅意也今天下事壞在紗帽氣不壞在頭巾氣
假使天下士大夫不論官大官小宦淺宦深常帶些
秀才意思迂濶古版終是儒者行徑人人日把經書
論孟收拾身心天下何必不三代而無奈功名富貴
之徒反于禮樂絃頌之事爲仇也則天下之所以治
日少而亂日多也臺下其且謂之何哉一嘆

答貴州巡按侯

大都黔事薄人而不薄于人亦自正着然入必思其所以出住必思其所以安豈有深山叢菁之中懸車深入而不爲後動休兵久住而不防中變撫臺失策何疑而督之未有應援未必坐視倖災其與撫皆當易心而未有遠謀耳大疏規條已自寇在目中矣此以復還望早入春明始悉彼中情形好共商討望望祝祝

答福建巡撫南居益

東南海沸幾欲滔天乃惟知爛額之顯著而不急徙
薪之全功識者不解也白臺以安攘鴻才赴艱難之
會無米成炊虛弦落鴈俾八閩半壁指日收寧勲庸
之捷誇千古而寇當時矣一方底定當求已試之范
韓折箠以撻四夷端在望中爲社稷慶奚止辱知如
漣者哉遠聞所施曷勝欣躍望風懷企可勝翹瞻

又荅福建南巡撫

不肖迂慙性生動遭厄會向以女戎犯屢終無夾輔
之能而嘯傲長林初衣自老無復長安夢想矣乃以
聖恩疊眷再對明光奈國是日非權璫握柄顧祖宗
之天下君父之綱常誼難瞑目縮手聽其涸亂共如
上方之劔徒請舉朝之諍固聞奸權內外共有冤恃
益張冤罔究而思之不知作何世界也惟恃台臺蚤
清海氛入秉鈞軸悟主心而清君側我輩且拭目望
之焚籲祝之耳白論誠切憂心同殷竊睇正人曷勝

崇拜

オノノニ

答朱總督

方今東訌西叛祗有敗衄而謀定力沉立收平定之
功獨惟台臺耳韓范名高旂常勲最千古猶懸丰采
我輩何勝爲社稷手額讀獻俘之疏真令舉朝吐氣
安得劒履早入春明還爲一人晉逼近京邑之克醜
哉數行代候一布喜躍燕私總惟照在此時長安人
無大無小惟爲左右誦彤弓之三章耳引衡卿雲斐
映錦江玉壘之間如龍如螭莫由從之倍有戀切

答丘御史兆麟

洪惟老公祖心生造化手有經緯故事到面前輒有
幹濟處分前教督楚餉仍當愛楚人此至言也夫所
謂愛者豈必無令其辦納膜視黔情而祇與楚人照
照乎就中嚴耗增清完欠酌緩急民適還其應納之
分數而黔實得其先後之漙輸以楚之錢糧濟兵不
以黔之供應苦民此臺下造化心經緯用也不肖殊
爲楚民與黔事手額而不虞計部之如此派發也無
論催督之使四出而不濟于用卽楚之解運亦何苦

舍近而就遠此亦計部之偶未經心籌筭耳今大疏
至亦無以自安卽改正矣又諭遵義一事夫遵義川
黔要地新撫重兵于此深爲得着今賊先據之矣又
當費一番周章奈何大率任事者未到頭卽想歇手
議事者方起手不共協心深中川黔今日情勢矣豈
惟川黔哉試觀今日何事不是如此無挈頭領之入
事歸于一而無不潰于成難矣今日叅酌兩地情形
提挈兩督精神筭定一至當不易之着而合觀其成
總以紓一人西顧之憂願翁臺無讓若欲問之廟堂

不聚合則娛堂誰敢執其咎而已真切真切草率布
候總惟照在

答廣西王御史心一

粵亦風林激湍之時也撫按粵者惟是綏懷而休息之令其喘息定而生氣稍旺可耳此中斟酌機宜威惠劑用寇不當示之以弱而更不宜示之有可乘土不當示之以擾而更不宜示之以有可驕故增兵以無示弱而卽以示土之無可驕不調土以無示擾而卽以示寇之無可乘見臺下之良工心獨苦矣且用兵但在能用之與否耳故能用則隨募卽有兵而何兵不可戰故岳家軍郭家軍在武穆令公能用之耳

非兵能爲岳能爲郭也然則援黔者亦何必粵土兵哉大方之敗非兵之罪矣讀手教吾知嶺南億萬生靈慮無不是處瀾安而人皆席帖也願好爲之社稷賀拜明惠焉真切真切草草代復未盡一一

又答王御史

臺下洞識岳力自是治平名世粵西借鼎巡行此五嶺山川實式靈耳從來地方無難處世事無難做得一幹濟人便無所不易只是形神俱苦耳以苦而易朝廷之甘地方之腴君子定不辭苦辭勞則今日臺下廣西差之謂協濟鹽法兩項苦在柄有兩操當費左右劑量至于荒遠而選科甲言者屢矣而部不應也乃今之放肆罷庸未必盡科貢而無賴之科甲爲多夫提掇其精神令賢者益知所淬勵而不肖者不

敢不洗滌其肝腸以就我之型鑄有斗衡之揭轉與
風霆之鼓舞在長安不復憂粵西無好吏治矣其切

其切

答楊總督

大方之敗咎在驕而貪功不鞭其後與督餉者何與
兵敗在溪山叢菁之中欲人走數百里與之同死從
來無此法惟是台臺一片老成忠計見格于驕愎者
國家不得收安戢之利且并後來委曲周到念念爲
縣官相成苦衷都欲抹殺此則公論之所共未平也
清泉白石佳月好風台從且共夷猶從來公道終難
晦暗耳匪謾匪謾

答陸御史

獻明

稔惟台臺文武憲邦宇宙在手卽今按黔非久而寇
在目中籌餘掌上據見今料理規條黔事已過半矣
後來但曹隨足耳黔撫當并制蜀始便彈壓調度自
是不易之論也惟是黔與楚聯楚頗苦于接應楚之
望福星有以幹濟而蘇全之日日以幾也計已在老
公祖斗衡斟酌之中矣縣官方東西苦兵而逆璫權
保無天日子宮中弟不揣力憤發其奸亦曰完弟心
上一件事耳成敗利鈍俱聽之于世運不意滿朝公

憤彼內之盤固深外復有政府力爲之主全無一動
直令滿朝無色弟甚愧之更淡憂禍將大也台臺其
謂此事何哉

又與丘御史

長安人見大疏入便稱爽俊直截論事核而膽詳而不冗劉而直入竅會有用文章則今日大疏之爲宣公奏議也直是吾鄉高者早低者潦民生軍計兩難又多費良工心苦奈何奈何川黔當合兵須心力亦合乃珍兵之用也處女脫兔九天九地審機應變敵不足防而我之兵口不及一問眼不及一曉風雷惟吾所之恐兩操而各有統領一事而互有關會吾未見事之有濟也此亦不可不慮也所幸二酋旣已無

家米貴斗金卽諸酋或應狐兔相援決不能聚糧具
械相從此可困之機耳堅有以相持妙有以應變台
下無妨爲兩地一合籌也然不肖之語坡公所謂試
妄言之而妄聽之可耳草草代布惟台照在未一

與祝秀水

別我年兄六易霜露追思吳下風波同舟長安言笑
追隨情景如夢欲更得良緣如昔便如弱水隔望蓬
萊梓未可與至矣奈何奈何却念二三兄弟在京在
吳鵬南病廢京咸作古起衡近一厄于詿誤仁兄大
受噬于譖入弟顧獨以六月辦事之給事三年縣懶
之病人亂遂靈庇蹴冒憲席真是容容厚福而廻環
心契之彫殘亦不覺心酸涕落也乃長安不成世界
矣門庭之寇難消蕭牆之禍將見其在臣工惟官是

競職業全拋翻覆雨雲跳美魍魎豈是高人陸沉金
馬之時實爲梅福神武掛冠之日矣弟近日復自多
事以積憤狠犖逆璫拚却一身亦曰盡吾心得幸削
籍歸可耳不意憤起通國而無如福建子力爲之主
何不惟致通國無色而更張兇人之焰弟直欲愧死
更憂枯叢之禍將大此時悻去非禮引避似怯而留
此何色更欲拚身無益別尋納牖無方觸藩殊苦祗
煎憂成病耳當亦虛名自誤躡進干忌也想我年兄
尊鑑自美松菊堪娛理亂且可以不聞散恣多取而

無禁世網外之放人性命中之真得矣以弟想望真
如籠中鳥望雲中鶴耳仁兄不憐我而反獎藉我耶
接得手教捧讀如對而把臂無從不免更勞人夢寐
矣再拜授餐之愛卽以易京米數斛時時飽嚼明德
耳諸年侄今當有拔轡者黑頭宰相發基此時弟向
自誇首相者今當讓元輔矣弟八月中歸計可畱當
訪戴于龍沙匡廬之間作一月游須掃一淨榻待我
餘懷不勝戀依薄具京紬引改衣一念耳

答黃汝良老師

上年讀地震星變大疏引証規諷詳瞻直切連窮念
年來臣子卽端揆丞弼惟了票擬故事與領恩拜爵
而已于國家事全不見着半點心若所稱慮險防微
隨事盡規若我老師惓惓于天人之間者有幾卽如
逆璫雖未流毒縉紳仍曲意交好政府而欺侮至尊
不啻兒戲欲將人主國母并歸掌握敢行毒手卽中
宮震器惟所欲爲此從來未有不但瑾直所無也連
之拚身一告亦實憤不過心庶幾邀先帝之靈少一

得當耳不意當國者別有肺肝力與逆作主硬與公
論爲難于逆稱勤稱勞擬功臣比大臣于公論稱閑
稱謗冲聖遂無張主一聽內相外相處分且教打得
一兩個人言才得息嗟嗟掃除奴隸一旦列于大臣
勞臣不知是何心腸其與我老師憂危杜漸中丹不
啻鳳麟泉獍豈真心間無血不過與逆素有首尾厚
吞鈎餌旣焉今日之榮歸復覲後來之速入耳其實
空華易盡遺臭難消試向平旦自問如何過活合之
修省大疏不下一付精神全在逆牆着落讀書識字

反不如狗彘受人豢養猶知護其主人之不如可殺
可嘆耳我老師一片忠義肝腸如此合之急當消弭
一疏十事條陳并與黃鍾梅一書千古而下誰能消
磨亦安取蟒玉炫耀俗人齷齪嚙穢君子者爲哉天
欲祚宋恐老師亦不能久酬洛社也至于漣辱託宮
墻致主無誠射隼無獲反致通國無色更張之焰直
欲愧死更憂枯叢之禍將大矣奈何奈何此時悻去
非忠引避似怯而留此拚身無計納牖無方但有鬱
鬱煎憂成病耳老師何以進而教之若已氏之子自

不能容于公論矣惟老師珍重治平倚賴之身金甌
覆字終是捉鼻不免耳憑楮不勝迴環繚切

答陝西巡按霍鉞

方今固圉保邦畢竟安民是第一義而奉行上意以及下者則惟有司也夫有司之苦在我輩當體當敬與其寧一路哭則我輩何辭于察吏故使墨吏望風解綬正國家借鼎壺下西夏之意矣惟是地方苦而且遠選人多以無資緣與有議論者充數是棄地方也酌用甲科與有聲聞者大疏議論甚確只是當事每如褒耳也再如募兵事不問領兵者之爲郭令公岳武穆而惟指岳家兵郭家兵昔人曾笑之矣况虛

此以供彼之無用而強風習不慣之人以從戎俱爲
無味又不必論到利害矣閣票與部覆自能如尊旨
也近聞逆璫益日微色遜聲如此厝毒藏劍奈何乃
當事者止量安身席寵更不一計及宗社之禍豈其
真無心肝哉附聞發一慨嘆

答陝西巡按

臺下罡風岳力洞識遠神原我輩襟領世道鈞衡也
朝端久藉主持關中新資貞肅華山渭水之間另有
一番氣色關中不謂無事地莫此邦本以燕一人斯
社稷式靈之矣我輩曷勝手額惟是駕行後正氣之
聯合未融腠理之葆和未細不免爲小小似是而非
之人以致同中大有參差二三同人調停不下今且
各稱干戈矣君子之去留未決世道傾覆可憂奈
何奈何臺下其何以處此倘有書長安諸君子還須

各化褊心共維大體始于世界有賴耳數行代布濶
私惟台照在

與蘇松察院

前得報爲地方留賢太守此自順人心事科有別議
此風聞愛憎之口未曙於地方之真情也大疏欲爲
請告此固有激之言然無此憲體地方多事正藉綏
靖彈壓豈宜輕言去院覆時爲朝廷借大賢以爲地
方報命未完簡書可畏還宜勉愛地方以成全仁張
守之貞執不撓人固知之矣餘懷馳切未一

與河南巡撫程

恭惟太老師台臺當年鳴鳳朝陽今日巨鰲奠極治
平共推名世幹濟久稽天民卽今借鼎節鉞中州亦
謂版章腹心之地關係尤巨爲一人奠此重地非名
臣未易語此且別歷中外聊以統鈞樞筦之地暫假
轍於此焉亦實嵩山汴水之靈爲此士民邀有福星
耳惠此中國以綏四方我輩且爲中外又安手額接
得手教如奉顏色更拜瞻容推懷撝謙至意仰見大
臣集思廣益千頃洪襟度越尋常遠矣願門下士燕

卷五
時獲請益今斗衡若遠不無令人心怦怦也

與貴州巡撫

今縣官外患一東二奢三安總犯順也而情有不同
東爲蓄奢爲驟安爲激處三逆之事東若凶而成都
之圍實難我素狎於安酋驟乘其無備迅雷旣不及
耳掩有驚潰而奔風且無所不颺如是爲守乃成睢
陽之急如是而勝實爲湧金門之捷矣若三路旣敗
之後東之來儘緩而我之備亦儘足敗乃公事者強
不在東也至于安未必真有殺大臣之叛心逼城下
之叛惡聲爲恐喝妙有開釋酋下馬羅拜耳其餘一

二愚民稱佛下世當爲天子妄男子而已黨不成兵
衆不成敵然而消之震而收之一有司事畢竟殺人
盈城盈野封拜則可矣終不足爲成都與承寧之役
道中間漸逼而緊促之淺入而周卽之寧爲窮獸之
縱無分拓土之茅聖人臨事而懼好謀而成其如是
乎冲主中興卽麟第一有所以成功者矣不肖書生
之語然此心則非敢爲漫也黔事往不必追諸酋狐
鼠枝蔓已盡鈴閣目下此間再差不得些須我輩辦
縣官事不必有其功功亦不必自我出蔡元禮公祖

可與言者其無吝細商而深計之可乎西南半壁端
當一力擔承讓以才而辭以疾都非敢聞命矣餘依
切未一

答四川朱巡撫

成都從來勘亂定傾儘多名賢然禍發於未及備功
成於萬有全不惟今日獨矣天祚國家所謂五百年
其間必有也庶幾西夏功成韓魏公還早入朝以相
天子可耳余守實有古意夫古道之難行久矣板而
員用之直而曲成之夫枿椽輪囷不落于捐棄非材
有用用在造化在手者矣嗟夫天下做官而做事者
幾人哉實于做事求做官者又幾人哉不肖感于台
臺之諭余守也不覺慨然三嘆

答直隸巡按劉大受

方今徵併無休增派日甚民之醵急極矣所賴巡方使者嘉與諸有司休息而生全之亦惟是舉劾一事以明示其意向而醒滌其精神古人之所以不惜一家哭也臺下矢以不欺而又明恕以出之吏安有不肅而民安有不生全者澄清猷烈已見大指矣服服幸益勉持之數行代布未盡拳切

與浙江巡撫王葱嶽

我年丈到地方便定一大難成一大節今又作富鄭
公活流民事安輯生齒彈壓奸宄保障東南不負天
子使快甚暢甚至子弟積憤客氏魏忠賢前年禮科
時卽起念入而請劍拚却一身當以小兒婚事託蕭
元恒小女嫁事託之徐京咸斥斷家事無所顧矣以
轉京堂故已之及去年上陵後又見謀帝子帝妃事
已擬入告而舍親家王思延泣止及見南郊胡貴人
事語之浮丘浮丘立止至今年又有如許事便忍不

過矣不謀一人草成一疏原面奏不意美定前月
新祈得雨二十九日必出御門疏先發寫忽傳免矣
幾乎悶死又疏已寫矣不得不封進知無濟于事亦
曰盡吾一點赤心萬一社稷之靈幸而濟耳乃疏入
奴哭繞屋走奶子與其私人盡力盡財打點一晝夜
乃乘上午膳時隨疏入免冠長跪絮泣不止專以奉
侍前老娘娘爲言上但領之而已曰你且起去本送
閣裏票奴旣先有人免問閣復與奴有首尾遂一一
如傳奉票上上亦不知而已又不意滿朝共爭奴都

掩過無端相公一揭與通國爲仇力稱奴勲勞上且益無張主奴安然不動有人且教之打一打人便怕又有畫策設謀用簽貼出昭代典則武宗處大臣言官事屬奴專與上看世事至此奈何奈何弟拚身之言無濟于用反滋之凶弟甚媿之更憂禍將大在國矣彼時小人偶言弟發疏爲左魏又言爲劉是庵周敬松嗟夫世間有如此呆子拚身不測之淵以爲可以不必爲之人乎哉又言忠賢好人反是楊大洪激得不好且無論其他如傳奉如停周士樸升不許魏

謝恩皆是好事可嘆世情如此是尚謂世界不倒哉
弟今欲再發疏似非卿貳體欲請告諸君言弟爲通
國共指之身說不得不得其言則去反似殺賊承頭
人未見賊退而先逃似怯但當靜靜與之相持畱機
而徐觀其敗焉然無益亦無色年丈何以教我弟此
身已不顧則要事如何爲當爲不當耳只可憐福清
一味遮護奸璫不敢道璫半字不是而三四閭老遇
傳奉到再不敢說半個字終不知此奸作何究竟乃
其手握重兵凡上之前後左右非其心結之人卽其

威劫之人上亦危甚矣而外之相公又如此力護上
固亦無以處耳可嘆也

又與王荊嶽

時事日非矣不旬日而部院一空且箇賤設罵直如
奴隸吏科及吏部河南道但有骨氣者逐起殆盡老
年丈見邸報當有憂心如焚者此事固中旨傳奉而
教孫使鬼實南樂爲政而主此行尸又是射聊之矢
然此輩小人終是作此敗着豈有人塗面呈身中官
而得爲人者獨恐此輩小人借中官爲用于去所仇
得矣乃大柄一到其手將至不可收拾爾時卽借內
小人亦欲自悔而不可得而天下事已去矣弟與左

兄楊左之局已結惟願剗有復時世道受福諸君子
得爲太平之民可耳此時還有數君子在事弟欲其
安靜不動但聯合正人鼓舞正氣徐以觀其變然以
曷其機蓋小人如此行徑驟雨飄風于理當無終日
者若群陰布滿瀾漫驟無開霽此又關世道在社稷
有靈如何耳聞小人又將百官圖進計年丈亦入黨
人碑然不在目前要地猶尋不着年丈當努力地方
厚曷視福無必以此着念有携手同行之意則非也
余與大洪景逸蓼洲肝膽道義雅相推重然居恒

抵掌談心未嘗不欲爲良臣不願爲忠臣也黨禍
興三君子駢首死忠余亦以謫歸里一切往來書
札俱付祖龍近曝書偶得此紙大洪筆也敘述詳
婉讀之如促膝面語不覺灑泣如雨因思大洪幼
嗜意在轉天回日出山已失豈其爲人爲事此大
洪所以疾首而亟自也此紙尚在人間豈非天歟

冷筆

與張遜玄

都中辱收在肝膽之末恨無能長得追隨以共事明
主今已作棄去之婦無復言箕帚事矣所冀老掌科
留心世道聯屬同人護持正氣端正直方共諸君子
不激不隨要令中外還見有清平之象可耳弟承使
人導之出疆如此骨肉之愛但言感猶淺矣今已過
真定恒撫又遣兵健再送青衣小帽長途馳馬自覺
此景非惡到家無官身輕卽誥命追奪于生身處未
免傷心然自皇上錫之還自奪之幸非違理辱親當

亦可以自慰惟是弟實受先帝堯舜面諭今不惟未
補絲毫且若致聖明有內蔽中官外逐大臣言臣之
名負此恩知不免夜氣一清時有淚痕如線耳身健
歸肅此代布依依惟台照在瞻對何時覩楮戀切

答鄭司理

不肖連之得此一放逐也實邀寵庇以荷載浩蕩恩私既得以微罪行不見爲抗權之迹于心爲安并不見爲怯權奸而逃于氣猶憊更釋重負滿倚化日之長睡到人間飯熟其受內外魏之惠爲多第初陛辭之夜且氣清迴念當年范几爲堯舜之言不爲無益絲毫而反覺于聖明有累枕上不禁淚痕如線未嘗不自嘆其癡此一點念頭橫擾直不知幾時漸漸忘去也濶別台光年餘今喜台光仍近矣忽接來翰不

覺塵顏一開啓緘披讀垂念老母前日教之忠今又
教之孝仰見天地父母之心與骨肉肝膽之契也計
不肖此歸或以達人寬我既不足道卽或以千秋名
誅我夫名豈臣子所忍言哉不幸爲禍始追奪誥命
亦如永叔之怙惡不悛歐母自能安之非韓稚圭固
不能向歐陽永叔作此語耳

答丘毛伯

不肖托在臺下幘幘且若並辱收之知契之末也止
以衙門舊套老公祖常過謙抑不肖當之每深汗仄
念惟川黔有事中間往來參酌機宜調劑情勢動有
萬全實藉遠猷遠識東南無厘一人之憂社稷實式
憑之矣卽以轉餉關中論今日事當亦非過不肖無
益世事之人但有爲引手加額而已今卽放逐歸里
猶幸爲安樂之民亦默受其賜多矣台旌臨郢相望
非遙無從一望顏色乃辱手教遠存先于匹夫何以

當此不肖旣已削籍奪封于往時一應門顏都爲摘
去尊君命安吾素也獨念民亦臣也台賜袞袞懸之
堂上名賢題品旣足千古朝夕瞻對殊覺色起是台
下之加于不肖者真一人知己可以無憾矣受者已
屢施者疊來有誦隰桑之三章耳至于長安新局當
是中外共効烹阿封卽墨佳事中間至此猛風雷霆
亦難終日願當事諸公無便謝恩私室還養些無過
激過陂有以藉之地也扶斯世于清平終在大君子
入有以提衡于此耳數行代候祇有戀切

與鄭司理

時事至此止是翻局面尚未見壞國事但願新當事諸公還只協心做君國正經事不必恩威惟其意是徇而日快恩仇焉更不必取快眼前而謂閭之票擬部院之用舍盡當聽之內邊以爲常也此在祈宗社之靈耳願二三君子從中幹旋維挽玅有調劑去者來者相安而各相成斯清寧之福世道受之所日望于大君子早入而定國耳考選事想公道固自在功名亦有定乾兒義孫徒是誤終身君子不詭不隨守

吾正而已接得手教仰見憂國深心層雲密霧之中
終得開一線陽明端當有賴漣且爲世道慶矣至于
不肖才非濟世癡足負官非惟無益君父絲毫而且
若播惡于衆焉君國之憂夜氣時有汗下日來長安
似以楊漣爲書帕者甚多而因楊漣以爲瘟疫者亦
衆內外二魏時刻不忘打聽應山往來相續山鬼伎
倆老僧能以不見不聞聽之然恐累人故杜門不見
客念頭上誠恐累及公祖過應山亦不敢請見我輩
精神相照肝膽骨肉已非一朝儘不在形骸間正我

輩之所以濟事也敢先布表惟台照在

與李侍御

世道忽潰敗至此矣碩果不食正氣泰復有基獨仰
有臺下還共一二君子存微陽于層陰挽日轂于倒
影而已想社稷有靈亦定不盡從群小筭計也日來
彼中合謀尚欲借汪文言以興大獄似不得甘心不
肖不止不肖身名早已無所不拚今亦無所不聽夫
復何畏何惜惟是不成射隼祇爲驅魚反若播惡于
衆而遺枯叢之禍于朝廷夜氣一清當汗愧欲死然
亦氣運應有此厄蓋彼之合謀已久端不肯令我輩

再爲大計考選之事只有待借端爲清流一網耳諸葛武侯所言伐賊亡不伐亦亡不如伐賊當亦前日之謂也聞近日内魏于閣部諸公有事只似上司分付下司絕無復下色和詞諸公藉之尊爵大官同聲連茹快矣只不知倒奉太阿其手積漸以往諸公將來作何收拾耳可爲長嘆秦楚天高莫由瞻對接得手教如奉顏色顧何能一承下風共傾倒一片憂世心腸哉

答王明珍州守

弟以癡愚久拚有此亦完得一前件惟是未能報君
父之憂濟國家之事徒傷由來大體掛累善類一網
清夜汗愧有穴可入至于一身生死儘不在心卽權
啗百毒千克能一念不動消受之硬漢硬到底不
消一攢眉一嘆氣以負老年丈共楚人氣色承翰教
仰見君子愛人真衷弟拳拳服膺矣此中借題聞一
係楊熊二經略我輩數人爲之行賄打點揀護無論
弟曾叅熊熊事敗時弟政在家卽入京時遇原揀熊

者還言封疆事重熊先衆而走我輩如何該抹熊與
楚人尚恨弟無情也又調專窮究移宮嗟夫倉卒之
際恐冲聖一落悍婦權璫之手事當可慮待其擅弄
大柄而爭之遲矣此區區杜防深衷今以爲罪豈皇
上或不該居乾清或乾清爭與別人住乎人情不許
人爲皇上至此更復何言以此而逮弟更當笑不當
悲矣

答張盤老

長安逐歸日日知必有此也諸長安人日日打筭諸
碍手碍口之物俱已逐盡目受順應之局俱已湊成
乃遂結此果弟非不知此行無幸不肯避亦不肯自
裁硬漢到底所謂拚却一身萬事休畱得一心或者
萬古在不失楚人氣性不敢言氣骨且亦不失爲大
張盤老癡友耳一笑一笑昨傳無他納賄却是爲芝
老事未必無相憐相念之情而封疆爲重題目大却
無相揀相保之一言內外所借以成今日之獄者以

樞輔上年緩決一疏韓蒲州姑待以不死之言爲弟
有書與孫乃孫處弟自入京出京并未通一字而蒲
州處亦并未一言及熊事古人莫須有今竟烏有萬
一此受冤心上越發無些子沾滯更快甚暢甚成就
一个肝腸如雪矣昨友人慮弟途中及鎮撫司奴當
有人百凡挫辱作何逸免弟曰但得到出門生死便
是臨以君父不是急而匹夫之諒死于妻子之手韓
魏公取吾首去是一樣見地與伯夷叔齊餓于首陽
之下是一樣餓不足亂吾方寸此雖弟謔語却亦是

正經附聞發一笑翁臺無過爲弟攢眉也縱騎尚未
到奉教未定言之耿切

答劉道尊

廣生

不肖漣癡愚求不負國家久知有此必不能久依化
日之舒長也但若輩以烏有捏坐自謂得題目可以
壓人不知祇可發人一笑耳孔邇在念無能瞻別乃
辱手教獎藉殷肫何以當此有淡感哉草率勤候一
志別懷引領慈雲曷勝馳戀

答崇智宗候

不肖于神仙之學未有窺也而志則僻矣惟翁台具
大智慧有大根器八公時過從游鼎成出世定當有
日不肖有緣幸侍顏色妄希備淮南鷄犬久矣向者
已投身道侶意訪懶殘衡陽而俗緣未斷兼以一腔
熱血猶有欲效于君父前者故復上長安畱以身報
當年憑几惓惓而不意無濟于驅狐去蠹而反若益
張其威焰且使善類一空斥逐歸來搜求未已意尋
前時五岳之游似涉于避逃克毒傷無所逃于天地

大義故杜門靜俟卽造訪老道丈之興亦成惘悵矣
今且束身就逮未定瞻對之日何時正在傍皇而瑤
函飛下捧讀如對感念提拔接引之意千生屢劫之
緣不覺泣下泣非愛此身傷忠未成于報主而緣虛
願于學仙且使海內忠臣義士將以某爲戒一味計
利害只知媚權奸戀祿位付冲聖之安危于度外太
祖高皇帝之謨訓法度聽其澌滅殆盡而不敢一問
也洛陽書生當此安得不爲痛哭流涕聞逆璫所以
獨相加者在移官嗟乎移官是不忍使冲聖制于悍

官人毒官人之手也是臣子一念防危杜漸之愚衷
而今以爲罪端然則竟請皇上避居何宮仍迎還侍
還乾清乎其與左袞諸公並罪者謂不肖護熊芝岡
爲之營脫翁台知某爲爲芝岡者乎傳聞樞輔請決
楊鎬熊廷弼等是不肖書爲倪求乃不肖入京至出
京未嘗與樞輔往來一字也昔人害岳武穆尚以莫
須有今且竟以烏有矣此等事不肖都能以一笑甘
之聽生死于君父付虛實公論于天下後世只可憐
過傷日月之明耳今緹騎尚未到若到省中開讀還

可共左右一瞻對言別只不知一別後再証神仙之
約能果如願否也幸老仙丈益堅素志無替前修道
成丹熟幸無忘癡愚愛國楊生終思所以超度拔濟
之也敬百叩頭以祝遠煩仙使何以克當勒此數行
代候兼布中悃扳戀瞻注之思徘徊黃鶴樓前日有
幾許也臨穎可勝馳邇

與薛撫臺

敝邑濱在萬山中崎嶇磽确絕不通舟楫也南兌二
米運至漢口不下五百里中間衙門之指索軍旗之
刁詐年異歲增克解者十家而六致破也議原不通
水次者例當改折如黃安麻城諸縣蒙上臺垂憐竟
得改折况應山南兌二米不滿二千太倉稊米幾何
若折銀搭解給軍于軍既便不則于中間應給官軍
每石折銀伍錢卽以本軍之糧抵懇乞仁人曲加矜
恤賜題卽造福無量矣又有無田子粒一項當年係

京山飛來一時官長未及分理久之武昌衛但按籍催徵破累人家無數後道府無計將此項派入條編曰無田子粒夫無田矣而坐以子粒亦可憐應山人矣細查此項原非官軍正額月糧俸鈔之類止是官軍閏月與破船折米之用共銀九百餘兩應山獨當其半其實三年間兩閏每年不過二百金在別處有田子粒儘可支辦卽日破船折米則十餘年不常有者每年餘積閏銀亦儘足備用昨聞之武昌莊同知稱此項應山俱未解武昌亦未收而應山此項淮入

錢糧正數則小民年年辦納矣不過奸書與豪軍大
家侵蠹耳是在武昌爲不急之供無實之名而虛遣
應山以無窮之累也屢經軍興事宜內條陳並小民
控告而卒未有垂憐甦活者事如有待仁人造命見
在查酌舒公祖已有意查一項抵補武昌永與應山
開豁尚未悉此項爲武昌得已之供應山無名之徵
也敢以控之老公祖惟閤心爲應山百世之利懇切
懇切

與舒按臺

前敝縣改折事今府查通省尖米數已經各處改抵
無餘今存剩無多議欲每石改折五錢勾搭官軍月
糧于軍民俱便者况應山二米不及二千設法通融
更易總在台臺留神完此百年福利事論吳方伯慨
然設施不必拘執批駁徒資糧胥刁難如延至公祖
覆命則此事萬萬畫餅矣子粒事前者止以爲官軍
正額不容缺少故須抵補去歲武昌莊同知過縣叩
之云係官軍閏月及備破船折糧之用此項共京山

等處有田子粒共九百餘兩每年閏月關給不足二百餘兩如此則用有田子粒關給不爲不足而三年兩閏扣存者亦儘可以備幾年不必有之破船折米矣據莊同知言此項應山逐年未解武昌未收而應山百姓則年年于正數編納據莊同知言則武昌止存無益之虛名在應山永受無窮之實禍祇飽侵牟之壑也則亦何利之有此中儘易哀濟通融只在公與藩司一留心造福耳千里走人非爲干請惟台照在

與攝篆藩司

秋季水月亭中一對旣慰生平更濺投契喜暢至今
宛在也承宣之地藉鼎篆視陽春一到自然百昌俱
遂而不肖漣久憐戚里私情又有偏濫慶幸與望開
恩者則改折南兌二米與無田子粒也前已面懇想
仁人留心今覆詳皆從貴衙門確定大率應山不通
舟楫濫在萬山于例自該折色况二米不滿二千又
太倉之鼠餘耳折色實爲兩便惟白臺准與題覆若
無田子粒四百餘兩向以爲武昌府給武昌衛之正

項也非抵補則無從豁免昨武昌莊二守過縣言此
項乃備該衛官軍閏月及候補解運破舟折米之用
閏月每二年之中不及兌支二百金耳子粒全數在
承德者合九百餘金在別縣有屯田者歲解不及十
之一二應山則全未解本府亦絕無守催卽今閏月
亦止派別處有屯者三分之一并未派應山一分據
此今後但百姓不納縣官不徵可耳不必多爲詳轉
如此則此一項子粒在武昌爲不急之務爲虛當之
名而在應山派入田糧正數則年年徵年年納年年

比于烏有武昌虛借耗蠹者以名實遺應山之辦納者以無窮之禍也然則武昌亦何利于有虛名而當實怨也不肖漣妄意無田輸賦仁者所憐其有田者卽責令逐年完納何辭除閏月遇年扣給逐年存餘儘可以備閏月解運破補損米之費或萬一破損偶多扣存不足或該府量爲設法或詳申藩司量與濟此似情法兩平經權各歸鈔劑者是在仁台造命耳

再與分守周道尊

前應山改折事蒙老公祖百世之恩撫按兩台各以批允只藩司糧道一覆確耳昨抄得司文如輕賣蘇米二項如事理不容不一詳確惟是應山米賤當秋成時每石值不過三錢今折五錢雖免于解運貽累小人止知一身一家之利復爲五錢辦納已覺無利矣若正米之外又要加耗加費則此事恐反成怨階矣藩司吏書難厭弟沒奈何轉人與說又送過三十金而意猶未厭也若非恃有老公祖申詳在不知如

何作梗乃其欲未厭又或多生枝節則應人反苦萬
望仁天開除耗增免後來枝節之端是爲無量受福
但此事更得一題始可永久尊裁以爲何如漣亦當
再有字兩臺也子粒事撫回字稱應山旣未解武昌
亦未收不如扣作新餉亦可少甦民困此亦最妙事
亦望老公祖主張成之總之天地父母疾痛必告呼
號無已耳